

KLIP KLAP

BON DIA

Aruba

News / Features / Gossip / Celebs / Reviews / Fun+Games / Community

Festival Himno y Bandera



**dedica
na Jossy
Brokke Jr.**

Festival Himno y Bandera dedica na Jossy Brokke Jr.

ORANJESTAD - Dia 10, 11, 12 y 13 di maart proximo Fundacion Un Canto Pa Aruba y su Himno y Bandera lo presenta otro festival dedica na Pais Aruba den Centro di Bario Tanki Leendert.

E festival lo ser dedica na e gran cantante di tur tempo Sr. Jossy Brokke Jr. kende tin 50 aña den farandula Arubano y internacional. Jossy Brokke Jr. manera cu Sr. Edison Croes a yame prome biaha cu el a presenta dilanti di e microfonnan di PJA 10 na Voz di Aruba durante su programa dominical “Buscando Talento Artistico” na aña 1956, ta un di nos cantautornan mas renombra y di un trayectoria hopi amplio den nos mundo farandulero durante e ultimo 52 añanan di su vida.

Ademas di ta wordo considera un di e miho cantantenan di Aruba y di Antias, e ta un remarcabel compositor.

Hopi artista di Aruba y Antias a graba su cancionnan. Entre nan su ruman muhe Dhaddy Brokke, Sharon Rose, Rachel Kraayvanger, Ana Lilian Kock, Sandra Croes, Olga Antonette, Robert Jeandor, Joselito Geerman, Edjean Semeleer, Farley Laurens (3 biaha Rey di Tumba di Corsou), Tony Sherman, Kenchi Sherman, George Willems (q.e.p.d.), Boy Thode (Corsou), Humberto Nivi di Corsou tambe, Kenneth Giel y varios otro artista mas.

Jossy Brokke Jr. tabata e prome artista Arubiano cu a representa Antias den un festival Internacional, Festival “OTI”, Festival Internacional Nicaragua y “Sur Americano del Caribe” na Coro Venezu-

ela, Festival de la Cancion de Puerto Rico, Festival de la Cancion de Barquisimeto y Festival Voz di Oro. Tambe el a gana varios festival aki na Aruba y na Antias.

Jossy su prome grabacion tabata na aña 1967 den Tele-Aruba y poni ariba un disco 45 RPM bou di e seyo C.A.M. cu ta para pa Camilo Alejandro Muyale, su amigo di bida largo, kende a financia e proyecto cu a bira exito rotundo.

Mas di 5000 copia a wordo bendi, cual pa e tempo ey tabata masha hopi mes. E flip side tabata “Quisiera tenerla” cu a bira e Segundo hit di e 45 RPM pa haci e disco un exito completo (cu dos number uno ariba un 45).

Mester bisa acerca cu e cancionnan a wordo graba cu e agrupacion “The Strangers” cu e tempo aya tabata tin masha hopi acogida na nos isla Aruba.

Despues a sigui e cancion “Dicen mis Amigos” cu a bira un Segundo disco number uno na tur radio emisora, tanto na Aruba como Corsou y Bonaire.

Jossy Brokke Jr. a graba su prome Long Play na Volendam, Hulanda, den studionan di “The Cats” na 1980, un agrupacion mundialmente conoci.

Na aña 1960 pa 1961 el a forma parti di e grupo “Los Casinos” y cu hopi exito. Despues Jossy a forma un grupo cu Sr. Camilo Muyale ariba harpa y na aña 1962 e grupo ey a representa Aruba na ASTA, convencion na Las Vegas Nevada. E grupo ey tabata yama “Los Caciques”, y tabatin hopi exito mes.

Na aña 1963 Jossy a bay Hulanda cu henter famia riba un

“buitenlands verlof” cu su papa Jossy Juliano Brokke, kende tabata labora como Hoofdkassier na Ontvanger pa Gobierno.

Jossy y su grupo tabata toca na tur fiestanan di Gobernador y na varios ocasion pa La Reina y su yiunan na momento cu nan tabata di bishita na Aruba y na Corsou.

Jossy Brokke Jr. a traha den casi tur e hotelnan tanto aki na Aruba, Corsou, Venezuela y diferente otro paisnan den nos region.

Ora cu abo tabata drumi nos musiconan tabata traha e trabao di entretene e turistanan cu tabata yega Aruba den hotel y restaurantnan.

Na aña 1978 el a biaha pa Hulanda unda el a presenta rond di e pais ey. Jossy a biba 1 aña y 3 luna na Ubach Palenberg y a actua na diferente ciudadnan di Alemania, Acken, Munchen, Gladbach, Bergen, Berlin, Koln, Heidelberg, Badden Badden y hopi otro luganan chikito den Alemania. Semper cu su guitarra bou di su brasa y cu su cancionnan preferi.

Jossy Brokke Jr. a haci un recorrido na varios ciudad Norte Americano pa e compania di “Divi Divi” den añanan 69, 70 y 71 pa promove e hotel den diferente estado Mericano.

Jossy Brokke Jr. a representa Aruba y Antias y Caribbean Tourism Association pa 7 aña consecutivo na e expo turistico na Berlin Alemania. Jossy a haci esaki na diferente ocasion na Groningen Hulanda tambe. Na Zurich Suiza el a presenta un luna largo den “Nova Park” Hotel cu su grupo. Jossy a produci cantantenan Antiano y Arubano manera Demarch

di Corsou, Ana Lilian Kock di Aruba y tambe Olga cu Kenneth di Aruba. Na aña 1996 el a graba un disco compacto titular: “Cancionnan di mi Bida”, cu tabata un gran exito pa e artista.

Jossy Brokke Jr. ta celebrando mas di 50 aña den farandula na es momentonan aki cu un tremendo produccion nobo cu cancionnan sumamente bunita. Un variacion di ritmo y composicionnan cu ta contene mensahenan hopi positivo, amoroso y poetico. Tambe mensahenan patriotico pa nos hubentud. E disco compacto a wordo graba den G&S Studio, un di e mihonan di Hulanda di cual Sr. Glen Gaddum ta e propietario.

E disco compacto ta un dobel CD. Uno conteniendo tur e hitnan di Jossy Brokke Jr. y 8 cancion cu a wordo graba tempo cu Jossy tabata tin 13 aña di edad y naturalmente esun nobo cu 12 cancion masha bunita mes. E CD aki a wordo lansa dia 28 di februari 2009. Directamente despues di Carnaval Jossy a duna un gran presentacion di e disco compacto aki pa celebra y recorda tur e añanan cu el a lucha y pasa den e difcil pero alabes e dushi mundo di Farandula.

Jossy Brokke Jr. kier a gradici Dios prome cu tur cos pa e gran talento y amor pa arte, y e salud cu Dios a dune pa e por a mantene tur e añanan aki, marcando su pasonan den e mundo di Farandula cu no ta facil.

Como compositor, Jossy tin hopi di gradici na su amigo Oscaruba, Oscar Figueroa (q.e.p.d.), un persona cu semper a boga pa nos compone y canta den nos dushi idioma: Papiamento.